

四庫全書

集部

欽定四庫全書

集部

新安文獻志卷九十六上

詳校官中書臣孫衡

侍讀臣孫球覆勘

總校官庶吉士臣倉聖脉

校對官中書臣吳甸華

謄錄監生臣梁鳴岐

欽定四庫全書

新安文獻志卷九十六上 明 程敏政 撰

行實

材武

漢故梅列侯銷廟記

汪克寬

豪傑之士生於其鄉歷千百世而鄉之人思之不忘像而祠之是必有其故矣叔孫穆子有言曰太上有立德其次有立功其次有立言魯鄒之祠孔孟以其德也錢塘之祠錢鏐以其功也濟南之祠伏生以其言也梅侯

名銷世居新安之祁門漢初鄱君吳芮以侯為將軍俾率百粵之兵從高祖伐秦入函谷關暨天下既定以功封列侯食邑十萬戶侯故城在邑西十里所居在邑城之東今為洞元觀墓在城南二里今為萬安寺舊有梅祠在寺之左至正壬辰夏燬于兵明年大梁趙君某來宰是邑亟命重建民謹趨之為屋四楹貌侯其中丹青黝堊照耀炳煥邑氓仰瞻迺石而徵予記其槩予謂吾郡有古丘墓三唐初汪忠烈墓在歙北之雲嵐山距

今七百年陳初程忠壯墓在歙西之黃墩距今七百餘年俱立廟墓道尸而祝之唯侯之墓自漢初迄今千五百餘年而鄉之人思之久而愈篤稽諸漢史吳芮始為鄱陽令甚得江湖間民心侯為鄱君所信任其得民心諒矣然則民之思之不惟其功而亦以其德乎其繼自今治是邑者亦如侯之得民心則安知他日不以思侯者而祠之哉至正癸巳冬十月望日邑南鄉貢進士汪克寬記

歙浦口重建蘭將軍亮廟碑 唐桂芳

時至亡隋此何時邪蓋天下極亂之時也大則連州跨境竊取名號小則千百為伍以效鯨鯢為人上者方事盤遊睽睽莫之制然春秋書天王出居于鄭甚言乎分之不可一日紊也則夫守土謹節于一時若蘭將軍者豈非難哉將軍諱亮歙人隋開皇九年併黟歙入海寧以隸婺州遂廢歙置新安鎮文帝愛將軍之勇命將兵守之經煬帝淫虐致大業之亂僻處一隅屹如保障撫

輯和洽恍不識干戈之苦其植德於人甚厚距城十五里曰浦口嵌巖峭峙歛海寧兩港合流奔駛鄉人尚識之曰將軍屯兵于此舊有祠宇蕪穢弗治洪武己酉彌月不雨主歛縣簿維揚繆君仲禮沿省檄營漕浦口重念民生多艱微粒食何以給賦稅支力役練日齋祓稽首曰苟甘澤隨靈以兆有秋願復神位六月辛巳乃雨丙戌丁亥又雨七月丙申又雨溝澮瀟瀟良苗奮興迅雷閃電白晝晦冥雨必自南來咸曰將軍炳靈用答於

我簿考工有日紫陽方士黃特敬以記為諉仲為兒時  
未遭逆燹城西門有蘭將軍廟金帽錦袍挽弓以射河  
西五鬼山五鬼山者陰陽家言不利于郡人宜為射像  
以厭勝則拔山蓋世之氣亦可概見嗚呼新安汪王故  
國香火最盛將軍禦大業之亂與王特後先耳餒而不  
祠豈人情也哉聲敲鐵騎月明溪上意英雄不死必往  
來乎其間也為作迎享送神辭三章使髻白歲時歌之  
有將軍兮貌魁奇金花帽兮紅錦衣彎弓弦兮月半規



神其右兮鬱祈祈曾伏兵兮敵岩扉水粼粼兮山巍巍  
朝而上兮玄猿啼暮而下兮白鶴與飛神彷彿兮來歸  
路漫漫兮疇依

有將軍兮蘭氏當亡隋兮季世凜英武兮捍鄉里神之  
靈兮洒甘雨電搖幟兮擊雷鼓水洋洋兮悉沮洳易荒  
沴兮為豐稔奠桂醑兮薦禾黍神之醉飽兮我心喜

浦之口兮兩水間石礚礚兮山巉巉樹枝樛兮不可攀  
虎伏坐兮鬼撼櫟儵而來兮忽而還煙暝暝兮雨斑斑

走旗旒兮馬嘶寒誓慕蘭兮心溥溥

唐故長史吳公任歡廟碑

張式

有功於國者則裂地而封之有福於民者則立祠而祀之  
于以篤勸賢之道于以彰旌善之規也其或運廟算而  
清天步仗神氣而翦羣兇道暢列城德符百里存乎信史  
炳然可觀若身出流俗力平險難禦寇活民見義懷勇者  
則有唐故吳長史馬公諱任歡世居新安郡閭門人也其  
實則秦伯之華裔邑有溪曰閭門對峙巨石

夾以峻流或狀如門因其名也永泰初草寇集黨攻池  
州破石埭縣以閭門之地為控扼之方恃險作固偽置  
縣而據之復曰閭門縣民之患也其如倒懸者有矣朝  
廷殲伐未聞長幼無安居吉凶無常禮公乃默然智殊  
人神識超天地不假韜鈴克全籌略因率邑人數千輩  
決刺其黨或聞語者則應之如響從之如雲公於是奮  
鷹揚挺虎視鄙卞莊之勇笑慶忌之捷青萍一揮赤眉  
萬衆少頃悉斃長呼大震川搖谷驚不假魯陽之戈以

獻長狄之首所謂上天輔其勇陰德昭其義者也聚黨之所俄為坦途則履春冰而無險臨深淵而不危蓋以救沸鼎之魚滅燎原之火豈惜死於身者哉故得民獲胥樂地絕瘡痍男耕女織樵歌漁唱一方之俗賴公之力受賜多矣尋屬郡國奏稱請以褒美度其地可置縣焉地即黥之西鄉浮梁之東鄉因而建縣隸于新安邑有祁山襲山為名改曰祁門縣時代宗愈深嘉嘆召而見之曰諒乎十室之邑却萬人之敵者有矣旌義勇之

士行激勸之風特勅授朝散大夫石州刺史仍賜金紫  
示賞賢之道優異者也天下之士莫不欣然歸之長史  
復攝茲邑旋改正命為令終乃故鄉葬於縣西二十里  
地名烏頭門民之號慕如喪考妣扶老攜幼疊足架肩  
為之棺槨樹以祠貌若去獸之政與馴雉之風未足侔  
也民荷其德靡日不思仲尼謂仁者必有勇公其然哉  
然則有衛社稷之臣而無效命之志者彼何人哉嗚呼  
子孫所繼門風益微官誥戶部牒近猶在焉時或多故

人罔知之銘誌湮滅埏隴墮摧祭祀之禮缺而不修棟  
宇之規質而且陋予之為邑也嘗極覽圖籍或詢之耆  
年而得之實緬彼英風依然若存因遷其祠於閭門溪  
之南由是易茅茨為華屋闢陬隘為崇址教民報本達  
此之義又何必易水蕭蕭方悲烈士則祁山黯黯惜哉  
斯人刻石紀之非為佞也銘曰閭門之秀祁山之英中  
有義士維時而生視死如歸赤眉一平民受其賜藹然  
令名古有志勇公其出羣以寡擊衆排難解紛兇醜既

殲達于帝聞嘉彼英姿賜乃官勲覲祠貌之荒涼痛英  
姿之寂寞仰義勇之芬香何昆雲之牢落蹈水火以無  
疑俾長幼之有託顧累百之衆禽諒弗如乎一鶚始禦  
寇以活民終旌賢而作宰既荷德以思之豈間絕乎年  
載任谷變而陵遷緬遺烈之長在復刻銘以紀功激天  
下之慷慨將仕郎守大理評事徽州府知祁門縣張式  
撰鄉貢進士曹汝弼書篆額時端拱元年二月十五日  
建戶部牒先鋒兵馬使攝左羽林軍大將軍同正賞紫  
金魚袋權知歙州祁門縣令吳仁歡右可試太子洗

馬賞如故歙州營十將試太子洗馬擬歙州祁門縣令  
賞紫金魚袋吳仁歡右可試鄭王府司馬職賞如故朝  
散大夫前行石州長史上柱國賞紫金魚袋吳仁歡右  
可朝請大夫行歸州長史勲賞如故牒得牒具前銜後  
擬歷任前件須緣草竊出生入死躬當戰敵賊平後詣  
闕論功特奉恩命除朝散大夫石州長史恩命見今州  
無甄獎差遣賦役有同白屋比未蒙省符下州蠲免者  
刺史部檢得報官甲名同又得刑部檢報賦役令文武  
職事官五品已上父祖子孫勲官二品並免課役又云  
蔭親屬免課役者散官亦依職事例者吳仁歡檢勘同  
合牒下所由准式仍牒知者故牒貞元三年三月十二  
日令史王湓牒主事趙琦負外郎裴按吳氏又有唐貞  
元九年宋紹定二年兩牒與此大同小異故不盡載又  
按唐制入銜謂之賜紫金魚袋此謂之賞者考唐通典  
魚袋本施之朝官後四方軍興降出各道  
充賞凡在朝者謂之賜在軍者謂之賞也



汪司空武傳

羅願

汪司空武者唐乾符中仕州為游奕使先是州遣羅芟為弦高鎮將追寇於銅步以溺死四年遣武繼之武乃於武口創鎮至中和二年又於湔灘為營自武口徙判婺源都鎮事戰守數有功至龍紀初楊行密錄其功有云昨者趙乾芝殘黨經過遽能出軍戰敵擒節級六十餘輩殺凶徒二百餘人獲樊津之素書收熊泰之朱記時行密為寧國節度留後遂補為節度押衙光化三年

遙領汀滁二州刺史始武以私財買民地置縣城邑以  
其稅入已戶左右戰守凡數歲遷縣入焉因以制置二  
十餘年使其人不為外寇侵擾陶雅為歙州刺史暴增  
民賦武不為屈以故迄武之世縣人賴之天祐三年二  
月武死雅使衙內指揮朱瓌代之因制置巡轄四縣後  
劉津為都制置使而縣人至今祠武號汪司空子哀天  
復三年楊氏承制補左押衙長劍都副指揮使檢校工  
部尚書

程都使澧世錄

程 洵

洵生不幸逢時多故出入兵甲之間不知義方永懷先  
人遺澤及洵之身泯泯如此每每念及未嘗不枕戈涕  
泣思見四海乂安何太平之不易得死亡冉冉之相迫  
也已矣行年七十位不過巖將兵不能制鄰封控於縱  
橫之諸侯因以攘剽之殘寇長安何在指日下以掉心  
劒嶺未通望棧閣而飲血有志不遂撫楮何言重念先  
世舊塋鞠為荊棘故相東閣反成營場平時鄰里鄉黨

之人半是梟狐魍魎之物死者郊原暴骨生者巖穴藏  
身屋漏田蕪見鹿已遊於町疃軍輸兵餉驅民未免於  
租庸無日不兵無時不火顧奔迫之不暇豈簡編之或  
收由是譜牒舊書幾於灰燼既無路以報國復何意以  
辱先聊因戰守之餘漫緝世次之序自洵而上止忠壯  
公凡十三世居黃墩乾符五年歲在戊戌端午日黃  
巢別部入黃墩洵之族人逃難解散賊衆遂營本宅攻  
劫川谷蕩滌殆盡至仲秋初黃巢收部犯闕于時清蹕

無聲鸞旗失色行幸萬里自同天寶之游負乘九重更甚貞元之僭洵與兄湮思世故之殷共謀存活之計其後大盜移國方鎮勤王甫及一年李克用朱溫收復長安所在州縣戶口減耗其曾經巢賊所過則又甚焉自從賊後山落老穉稍歸鄉社兄湮遂謀於衆曰黃巢雖沒盤氣未除天未悔禍饑饉荐臻以湮度之不及息肩矣一旦如有雞犬之警吾屬彫瘵之餘豈有噍類衆皆泣曰其將若之何湮曰盍相與依山阻險以自安無事

則耕織以供伏臘倉卒則修戰具以相庇衛令鄉里雖殘破然諸君多少年一心可圖也衆皆許諾于是共推澧為巖將依東密山為寨衆不過四百餘人未幾草寇畢鵠楊僊童李重霸孫端查臯陳儒范珠相繼而至衆或一二千多或四五萬光啓元年閏月三日陳儒自黎陽引兵薄東密自午及酉接戰再四不克而去時鄰近巖寨悉皆破亡獨澧率勵鄉里撫之盡道故能得人之情雖甚疲敝戰皆倍力澧既擁衆以謂所在皆為賊守

俱非王人獨立以待無所欸附他部賊兵皆相畏憚景  
福二年楊太尉行密遣將田頔畧地列郡皆下惟澧堅  
壁東密頔遣人諭之曰太尉已受朝命都督東南行營  
今日頔來非賊也澧再拜對曰所以自保者不欲以三  
百年太平民坐為賊虜爾審如公言吾復何求田司空  
可得見乎頔因單騎入巖澧具軍容甚肅頔曰卿真將  
種邪澧曰司空見淮南太尉幸為澧言但得太尉府中  
一親信人至相與共事錢氏在吳不足慮也會楊太尉

有孫儒之孽未果從濬所請即表陶僕射雅知歙州奏  
濬為歙州副兵馬統帥檢校御史中丞依前東密嚴將  
兼領馬金嶺防拓等事以衙內都押衙程陣為副由是  
兵聲大振降下富昨黟山容山丁山等巖寨戈甲旗物  
於是始備久之濬以老乞解兵權仍請以嚴兵付程陣  
俄而本府以衙內副指揮使程言來領後事濬歸府病  
卒月餘程言果與程陣相凌巖兵不輯陶僕射大懼蓋  
歙州連接浙境最倚東密以為藩障故也府咨議陶映



言於僕射曰程湮久帥東密人情所歸今其弟洵亦足  
謀畧可更以東密授之於是表洵為東密巖將洵既至  
衆皆相悅洵無他長所守者先兄規畧而已每閱兵帳  
及戶口版籍見流亡者無算所存不滿二百戶每歲又  
納租稅及時糗糧芻草之積軍需調發科率百出因竊  
嘆曰後人逢時無虞體胖心佚豈識向上辛苦如是邪  
更有不懷厭滿非上念亂者誠何人哉故因輯家譜之  
次聊書以示子孫歛州都知兵馬使東密巖將銀青光

祿大夫檢校國子祭酒兼侍御史上柱國洵序

海寧舊志程富

忠壯公靈洗之後以勇力聞隋末之亂起鄉兵據古城巖推郡人汪華為帥華定有歙宣杭婺饒睦六州稱吳王以弟鐵佛為左相天瑤為右相富為太尉任貴為總管唐高祖既立富等勸華奉六州歸唐鄉人免於兵燹唐封華為越國公以鐵佛天瑤為長史鐵佛封宣城郡公天瑤封淮安郡公富與貴為司馬富封休寧縣侯貴封歙縣侯俱降勅褒諭鄉人追感華全郡之德立廟祀之以四人配食富居其一宋追封輔烈侯唐高祖褒諭璽書皇帝敬問新除宣歙杭睦婺饒六州總管府司馬休寧縣開國侯程富卿昔經離亂備嘗艱險戮力協心輯寧士庶中達幾變遙布歛誠念此誠為嘉嘆朕君臨四海撫有萬方事資英傑期安兆庶彼藩襟帶統攝不輕元僚之重故以相授宜善加綏御務立功績使鍾鼎傳業竹帛流名首冬霜寒比無恙否家門大小想各

平安故遣使往宣旨意仍寄信物以示朕懷武德四年十一月十一日程氏譜黃巢之亂富十世孫澧起兵

休寧守東密巖以拒巢副陶雅為歙州兵馬統帥兼捍開化弟湘以工部尚書守婺源子仲繁以戶部尚書守祁門浮梁仲節以兵馬先鋒守歙南節以領軍大將軍守休寧澧傳其弟淘淘傳其繼子旭旭廟食開化龍山賜額顯祐傳其從孫淮沅凡五世守東密巖湘傳其子全禮全禮以御史中丞兼領婺源都鎮傳其弟全臯全臯傳其子遁凡四世守婺源至宋下江南巖兵始解

汪端公瀆祠堂記

王炎

婺源東九十里曰鱣溪居人惟汪氏一族其始祖曰端公以官稱也唐大中間汪氏自歙徙而來此至今十餘

傳矣李氏時盜賊蜂起端公以勇畧選為三梧鎮將捍禦鄉閭拒賊死之衆慕其義遂立廟鎮傍而鰲溪咸恩僧舍亦有祠像在焉鄉人奉事甚嚴春秋祭祀以時歲久廟壞碑仆十世孫叔達謀曰廟祠不存則無以揭虔妥靈然立廟重事祠宇敝合新之於是富者出財壯者効力既訖工來請記炎竊惟汪氏得姓自魯潁川侯始童子汪錡能執干戈以衛社稷夫子正色稱之汪氏之名遂著于經史及隋末越國公奄據歙宣杭睦婺饒六

州之地庇護其民值唐興運納款歸朝位至金吾爵上  
公既歿六州之民廟事之荐以陰功進爵為王而汪氏  
由是滋大惟端公之賢其忠義似童子其智略似越公  
惜其地偏位下不克大焜耀于時然而生則有勞歿則  
有靈廟食不絕亦可謂豪傑之士矣故提刑王公汝舟  
通判胡公侃俱記其靈異之跡傳信不誣則端公位雖  
不登典祀奉以祠廟宜也公諱漬春秋三十二歲階至  
銀青光祿大夫勲至上柱國官至檢校太子賓客兼御

史大夫一子四孫舉族二千餘指餘慶所鍾蓋有所自

云淳熙九年孟冬望日雙溪王炎記

趙東山知本堂記畧曰宗法之廢久

矣近代盛時雖號為世家大族者其子孫往往散越與凡民等而況衰亂之世乎同郡汪侯早嘗有志於斯中遭多難雖軍務填委未嘗一日而忘乃即星源大畝里中創重屋上奉始得姓之祖神主中居初渡江者及始來居大畝者又為廟屋南像其祖之有封爵在祀典者配以其子孫之有功德者四人重屋之下延師其中聚族人子弟而教之時享月薦買田以給費合而名曰知本堂以族人之屬尊而年長者主祀事焉別為專祠於浯村故居曰永思堂祀高祖以下四世其田與祭則繼高祖者主之蓋知本者以明大宗之事而永思則小宗之遺意也自禍亂以來所在大家不能相保大畝之族以侯力獨完又作斯堂以尊祖敬宗教示將來其所以

遺夫族人子孫者可謂遠矣侯名同始得姓者魯成公子諱汪父名嘗食采潁川初渡江者漢龍驤將軍諱文和始居大畈者諱中元有封爵而在祀典者唐越國公諱華配食者曰團練使積官御史大夫諱漬中元其子也曰順義軍使檢校司空諱武皆以靖寇捍患有功曰宋西京文學四友先生諱存有經學行義曰端明殿學士招討制置使立信以忠節顯皆其譜實云

### 胡僕射 曠 傳

### 縣 志

胡僕射曠者婺源清華人少負才勇為鄉人所畏服廣明初黃巢犯宣歙曠起義集壯士禦之境上屢與巢兵鏖戰賊衆敗走井里獲全都統鄭畋王鐸前後上其功

授宣歙節度討擊使銀青光祿大夫檢校國子祭酒兼  
殿中侍御史上柱國光啓三年升兼御史中丞制詞有  
誓驅戈甲必掃欃槍之褒楊行密觀察宣歙復表其勞  
效加左散騎常侍又進檢校尚書右僕射兼御史大夫  
卒葬邑之洋莪子孫世居清華分處黟祁門甚盛祁門  
義成都福州及歸仁都營壘尚存土人號胡僕射屯軍  
之所又石壁及長洲有江衙將徐先鋒屯軍之所蓋其  
將佐也鄉人慕瞳忠義立祠歸仁都古城上宋淳熙十



一年遷廟許村水旱疾疫有禱必應大著靈異焉

此據星源

舊志如此金仁本新安文輯外編所載唐誥亦云胡曠  
惟清華胡氏譜以其事及誥文盡歸曠之子學又追補  
學傳於遷轉之際皆用宋大觀以後新定官名有可疑  
者豈曠學父子官行畧同而逸其事遂誤書之邪御  
史中丞誥宣歙節度討擊使銀青光祿大夫檢校國子  
祭酒兼殿中侍御史胡曠右可兼御史中丞餘如故勅  
爾等風雲稟氣鐵石存心奮驍銳於軍前立功名于馬  
上誓驅戈甲必掃攬搶迭升霜憲之榮用振轅門之勇  
可依前件光啓三年八月日司  
勳員外郎知制誥臣崔行

### 唐尚書王公壁傳

續圖經

公諱壁字大獻姓王氏其先自江左徙新安晉丞相始

興文獻公導之後也道十三傳至唐丞相瑯琊簡懷公  
璵生二子長及次又及為中書舍人生諫議大夫鐵鉞  
生丞相魯國公搏又生鍼公所自出也公生而英毅好  
奇節讀書任俠於魯公為兄弟以世亂不仕乾符中巢  
賊入江東詔天下鄉村各置弓刀鼓板備羣盜公以壻  
鄭傳負材畧相與倡義集衆保州里每賊至即率傳等  
扞禦盜戢民安四境賴之時楊行密為宣歙觀察使命  
陶雅守歙雅屢奏公之功歷補軍職乾寧初以弟搏入

相請進奏京師會董昌叛浙東詔鎮海節度錢鏐討之  
加搏右僕射宣撫浙東西搏令公以書遺鏐僇力王事  
搏未行而鏐誅昌請以公叅其軍事授鎮東節度判官  
光化三年搏為崔胤所譖遇害公得報西向慟哭說鏐  
以兵問罪值宣州將田頔攻杭州甚急鏐遣顧全武求  
救于行密命公傳其子傳瓘為質于頔頔還宣州陰叛行  
密行密遣將擊斬頔以公宣歙舊人留為牙將而令公  
少子思謙奉傳瓘歸杭州公從李神福西討杜洪又從

王茂章南擊安全義皆預有功時行密得承制封拜累授公銀青光祿大夫檢校兵部尚書加金紫光祿大夫行密卒子渥嗣淫虐不道出公行祁門令公遂請老卜邑西百餘里之苦竹港家焉以壽終于正寢公子九人曰思聰朝散大夫曰思聯諫議大夫曰思仲中散大夫曰思茂行軍司馬戰沒贈越州防禦使曰思會宣州統帥曰思悰洪州教授曰思經直秘省曰思諒通議大夫諸子多顯于南唐曰思謙仕吳越為客省舍人梁嘗賜

吳越名馬一日斃王欲誅廐卒舍人令卒母姬泣告曰  
馬命兒償兒命孰償王叱曰誰教汝姬曰王舍人王怒  
思謙覺而去之為追兵所襲而死邦人義其事於所居  
之側立廟祀焉號祁山祠公墓在僊桂下鄉安定都文  
溪社之彎坦夫人及子通議墓祔焉按洪武九年經進  
徽州府志保障鄉  
閭類四人公居第一公墓地九畝二角三十步今僕  
陳迪守焉世遠子姓散處漸為迪後毀墾宋寶祐間裔  
孫元義告官復地四畝三角二十步山一畝元季僅存  
一丘正統中思聰長子敬璋派居高塘曰宏遠彥紹積  
慶等力復其舊云

唐司徒鄭公傳家傳

鄭延光

公諱傳字國寶生會昌三年癸亥歲隆準方面美髭髯  
身長六尺餘幼而剛勇獨力不羣自乾符二年盜發中  
原跨州連郡轉相剽掠搔動鄉邦獨公兄弟義居當里  
衆皆推服乾符四年黃巢寇江浙領三十萬人從寧國  
入涇縣卷甲來寇公以吾境山多令人設鹿角棧道以  
禦之當里之民幸不被害未幾胡曹犯婺源五福鎮嘯  
聚尋寇本縣居民悉逃竄山谷宗族隨之中和元年王

仲隱復自秋浦之赤嶺入當縣公慨然作色誓舉義旗  
招集義兵保護郡邑不旬日募數千人嚴加訓練與衆  
同勞苦仲隱知而不備襲之大敗未幾趙言集五千餘  
人屯西鄉恣刼掠燒廬舍公昆弟發軍士夜令人以吾  
幟插賊營飛火箭於中於是鳴鼓賊衆自相吞滅由是  
遠邇畏慕中和四年劉迺率八百餘人從建德涉擇根  
嶺因假我里公籲衆攻之賊欲久駐不得光啓元年李  
仲霸亦率千餘人寇本邑入吾里觀公之建營曰此智

將也吾不敢擾矣即去之大順元年四月陳孺起會稽  
從東屯寇當縣公屢戰屢勝卒平寇難是歲西鄉汪章  
南鄉熊宿各鳩土俗亦僅盈千恃勢倚强多行不義每  
因賊軍經過之後便為劫掠民間冤訴無門公因憤二  
惡之不悛也義旗一舉首戮章次殄宿當具狀申州乞  
申朝省郡守中丞憲公差人執牒慰諭公兄弟五人各  
受職事上復褒嘉我公即署為保義指揮益壯公用兵  
保民之志景福元年孫端自鄱陽來寇本邑公遣先鋒



百餘人押衙方脩部領義寨數千人與賊戰於水亭設  
兵擊之殺賊甚衆賊軍既敗犇溶口而猶子元範方守  
是寨率軍鏖戰端遂潰走浮梁十二月汪淑將兵先入  
黥後至當縣詐稱奉上命權轄兩縣事公密使人索其  
勅淑倉皇失對公知其詐遣猶子先鋒延壽帶精卒一  
千餘人禦淑淑軍敗民獲安堵乾寧四年夏章聚五千  
餘人至櫟根嶺先遣人來當營假道公發二兄藝謂巡  
檢延光領百餘人至彼以觀事勢章潛懷異心攻剽城

邑既見兵少便請索戰藝等覺兵寡難禦堅請歸營章  
舉兵相逐對壘數日先鋒延暉等以秘計衝破賊圍因  
縱兵擊之擒五百餘人得其輜重牛馬以賞軍士三月  
陳旭從浮梁來寇高塘公於險阨處峽山雷湖等置寨  
先設伏兵賊果來攻巡檢延光發伏兵夾擊之矢發如  
雨須臾賊軍大潰賊遁出池州界夏五月城門朱庠吳  
庠等剽竊南鄉入吾疆里延暉等統軍至洛口鎮黃沙  
灘與賊交鋒賊黨瓦解獲其所虜衣物牛羊稍衆分給

軍士公無私儲故人樂為用十二月池州趙僕射差蘇  
統制領軍至浮梁查教峒經過當縣見吾邑之民熙熙  
自若謂我公保護生靈賢於長城遠矣是歲李尚書赴  
歙州任公招集所管兵士申州奏請乞休退巖谷不復  
視事尚書以公之言奏上復丁寧曰公以忠義奮身立  
節柔能恤衆猛可除兇慰諭而獎借之俄爾吳王行密  
勅下補寧國軍節度押衙保義軍使檢校刑部尚書右  
金吾將軍同正光化二年公以查教峒賊復起為寇乃

於日新里步屯軍先鋒延暉屯日新巡檢延光屯溶口  
忽報查賊入安德里刼掠溶口軍先至日新軍後至公  
進兩軍合戰殺賊殆盡九月義成寨總管方標馴翬寨  
總管胡滿結釁上司頻降指揮二人不肯相和公乃遣  
卒四千逼兩寨先遣人諭之曰和同則不進軍更自矛  
盾即當撲滅於是二人各立降旗公仗大義讓之曰當  
此之時愛護衆庶如護元氣守望相助疾病相扶兩虎  
安得私鬪哉二人請罪公釋之光化三年公遷日新里

屯軍是役也公躬親臨視郭內百姓欣迎於道歡聲鼎沸自是四境之內兇徒屏跡衆庶咸安堵矣天復元年田相公收錢塘圍守三載當營差鄭寶率千餘人共收之時寶入見田公因問曰唯爾軍獨整何也寶曰受尚書嚴令不敢有違乾符四年事田公嗟嘆久之謂曰不有君子其能國乎於是申請於朝制下受池州制置公辭以年高不赴任天祐三年浮梁金安者尚據孤壘遂發軍士圍守三月公夢一女戴蓋頭拜於寢前于時公

營有異僧號曰大聖釋之曰女戴蓋頭安字也拜於寢前者金安投拜於寢前也勿加兵姑以待之明日安獻地而降大聖曰此瓜藤形也子孫居之綿綿不絕名曰新安焉尋奉恩制受饒州副使兼知州事公退遜恩命辭以年高願駐家山時平樂汪思海口諸巖寨猶有擾民者遂從司空陶相入衢郭破大浪塢口一十寨擒王廷顯顧全武等再破婺女獲夏候以為獻吳王於是增秩淮南節度左押衙保義都指揮使金紫光祿大夫檢

校司徒兼御史大夫上柱國詔曰三秦蟻聚九廟神遷  
貢章罔達於嗣君行賞慮孤於勲將先帝以朱題御札  
鈿卷綸言倚獻替於誠臣俾匡持於大業事無細大澤  
在滂施前件官媚奪珠靈高分嶽秀力學而九流相瞻  
游心而六藝兼長聲響如鐘盧子翰輝光於簡牘人材  
比玉嵇叔夜未足以稱揚洎乎巢盜亂常鄰偷伺隙築  
高壘以橫遮一面屯義旅而旁振三州故得播以恩威  
歌其富庶耕奴織婢自有區分烏馬鯉魚各無差謬今

則方思尊獎益仗忠勞領前鋒必勝之師副掌武旌賢  
之舉雅符輿論顯叶前功爰升論道之班兼表統兵之  
柄可充欽州左右先鋒都指揮使兼西南防遏使迨至  
開平元年民苦瘡痍之後漸獲息肩之所公以本營事  
重請命于上自甘野處尋屬制下不許辭免加兼右驍  
衛大將軍同正公自廣明迄天祐創置巖寨垂三十年  
握兵三萬目覩軍興務加存恤民不失所獄訟不興時  
天下未定獨我一方之民安生樂業當縣自古產茶尋



遭亂離競采雜草公止絕弊源更以佳名謂之翦草商  
賈輻輳人賴其利至於官人權貨亦及百餘萬上下兼  
足則公之保護鄉閭有功於世豈小也哉開平五年十  
二月二十日薨享年六十有九次年歸窆于田源公凡  
四娶正室王氏封瑯琊郡夫人繼室陳氏孫氏江氏子  
十三人延暉克左押衙右先鋒第一部都知兵馬使檢  
校工部尚書天祐三年戰越州諸暨縣亡于陣延辛克  
歙州團練押衙銀青光祿大夫檢校國子祭酒兼御史

中丞延匡克左右先鋒指揮軍都頭順義七年往撫州  
投臨川克右軍散押衙水軍都知兵馬使檢校工部尚  
書延光克節度押衙左先鋒第三部都知兵馬使銀青  
光祿大夫檢校工部尚書兼御史大夫延紹克節度押  
衙前兵馬副使延芳授將仕郎檢校饒州館驛巡官延  
璵延琚延珣延玠延闕延英延昇夫洪荒之世部裂封  
疆創立國邑更名易號何代無之若當州始則新安汪  
王世華之起建也增以歙州之額當縣本亦鄉土因吳

公仁歡之起立也加以祁門之名非獨以創置為功重其當危難之時立庇業之大也天分秀氣嶽降靈衷公義相先剛柔兼濟奉上以忠牧民以仁則自先公始公長弟諱魯朝議郎宣州司馬檢校工部郎中知祁門縣二十餘年政聲大治次第諱玫左右先鋒都指揮使歛州中軍使檢校尚書右僕射兼益王府長史總握軍權上下輯睦兄弟三人舉無過事自吳王改保義軍為先鋒指揮悉封親屬為都頭公東收婺睦衢杭南破洪饒

撫信臨陣三十有八戰勝三十四處繼受綸言數十誥  
勅二十八道莫不四遠欽風羣雄懾服爰自先公薨沒  
予乃退迹戎旃固守丘園秉持祖業徽饒兩郡稅錢九  
千餘貫見有兄弟三十一房骨肉五百餘口念先勲將  
門之後特免戶門差役供輸兩邑苗稅火客三百四十  
餘所屢放驅使許為部助匪先公司徒功勲庇廕安得  
後嗣優閑謹錄初終用垂于后銘曰

有焯其行有煜其名其亡如存實乃德馨瞻彼田源為

公佳城歸於其間既安且寧保大十三年歲乙卯正月  
日男延光述

彭王畬廟碑

胡炳文

婺源郡西七十里霍口大溪自張公山來旁一派自三  
靈山來兩溪合處一山雄聳彭王廟在焉王諱畬霍口  
人唐末黃巢亂率兄弟扞蔽鄉邑死之桂巖思溪高沙  
諸處立廟此其降神處也凡禱水旱疾疫如響鄉民屢  
以非道呪咀者神即殛之死宋開慶己未重慶受圍兵

交空中見大旗曰婺源彭王圍遂解帥李遇龍上其功  
於朝加封夫以王之英烈生而為邑人排賊患死而為  
國家靖兵免且自江至蜀凡萬里光靈遠揚惠愛旁孚  
其勲德固宜與祀典為無窮也廟未有記鄉之父老陳  
惠陳穰礮石求予記其事遂為作迎享送神詩俾祀而  
歌之詩曰

雙溪合兮溶溶廟孤峙兮東峯水秀兮山雄據異氣兮  
神所鍾丑口微兮賊刃紅張義膽兮戕其躬飛精英兮

蠶叢擎大旗兮雲中月暈折兮息羣兇日光懸兮照孤  
忠役潛蛟兮年無凶驅厲鬼兮翱翔風神之福兮龐以  
鴻神之祀兮宜無窮

戴虞候護傳

家乘

戴虞候護者其先自袁州宜春徙新安至護始居婺源  
鳳亭里性剛果有武力值巢賊亂後草竊蠡起護倡義  
與鄉人團結自守會楊行密都督東南行營以陶雅鎮  
歙州汪武鎮婺源雅聞護名薦補先鋒突將都押衙兵

馬使時土賊余公美作亂雅遣指揮使張洪等自衢州  
白沙鎮進討命護佐之公美就擒進補廂虞候已而汪  
彖余知禮等以次嘯聚武檄護率所部掩擊之護戮其  
渠魁釋其脅從一鄉晏然時天祐三年也護尋卒雅表  
其子壽代領其衆吳順義中官至婺源左建威指揮第  
二將卒徐知訓復表其子安為右軍衙前總管充饒州  
左豹捷指揮第一都虞候安守饒甚有威惠南唐保大  
中官至銀青光祿大夫檢校國子祭酒監察御史上柱



國卒于饒州詔葬樂平柳檟山土人感德立祠祀之子

孫居婺源桂巖及休寧隆阜甚盛

戴護差牒勅都團練觀察處置使牒先鋒

突將都押衙第十將戴護牒奉處分前件官早推忠赤  
久著勤勞實深獎用之情特舉陞遷之典俾居重職更  
俟立功始終不渝甄酌豈後事須收捕散押衙充先鋒  
突將都散員兵馬使牒知者故牒天祐元年八月五日  
牒使檢校太尉陶戴壽差牒勅鎮海寧國等軍節度  
使諸道都統牒戴壽牒奉處分前件人素稱壯勇久著  
忠貞咸蘊義以思仲盡飭躬而待用令則特於行伍補  
署職名事須補散將差充婺源左建威指揮第五第二  
將十將牒知者故牒吳順義六年四月日牒使守太師  
中書令東海王戴安勅牒勅右軍衙前總管充饒州  
左豹捷指揮第一都都虞候申報本都公事戴安早由  
武幹俾列私門累換歲華頗聞勞績宜伸朝獎式爾旌

醕可銀青光祿大夫檢校國子祭酒兼監察御史上柱國餘如故保大五年三月日駕部員外郎權知制誥陳喬行

周都巡

繼忠傳

汪子相

周繼忠祁門人宋乾德間郡盜蠡起繼忠奮身討寇保安鄉民邑父老上其事授邑令歷九年人民按堵盜賊屏息建洞元觀為祝釐之地開寶九年解篆入京授西頭供奉官閣門祇候舍人累遷至銀青光祿大夫檢校太子賓客兼監察御史飛騎尉持節潼川府路巡檢使

卒年七十八朝廷賜金帛葬邑西高塘長樂源民懷其德祠於眉山左祀之凡有疾患禱之必應

英烈錢氏二侯

密甯傳

吳朝陽

英烈錢氏二侯曰嚙曰甯本兄弟讀書尚氣槩自曾祖大理丞隱之家于歙別墅在淳安之蜀溪宣靖中臘寇甫平餘黨尚熾二侯起鄉兵勦平之浙賊倪從慶寇淳安一戰敗去建炎三年秋金烏珠入寇將遡浙而西二侯率方庚等引兵逆戰桐廬據牛山之險敵人敗走功

聞補承信郎衢寇張花項犯歙且逼嚴又敗之郡賴以  
安卒紹定三年歙人上其功郡詣實申省詔立祠歙之  
乳溪賜額英烈忠顯侯爵謚惠濟侯誥曰昔仲尼  
有言綱紀天下曰神方建炎辛亥敵馬飲江蕩搖我二  
浙爾兄弟無尺寸兵在手乃能仗義率鄉兵戰烏珠于  
桐江下擊舟礮石敵幾不能支遂遁去推校功烈當與  
劉韓並驅而史失其事朕甚悼焉既列廟祠又班侯爵  
尚其子孫世篤忠貞以承休于前功於戲偉矣

蔣進義果傳

李以申

蔣進義果字明道居黃山其先世天台人因宦遊于歙家焉果性剛明仗義不撓不屈建炎四年金人入寇分其將馬吉以兵自宣城犯歙境果奮不顧身率鄉兵於烏泥嶺結寨鑿壕發矢礮石敵敗而退郡上功奉旨補進義副尉且賜弓劍旗馬以重之紹興二年賊魁張琪自饒突入歙焚劫甚慘果奉憲臺命復自備糧餉親部保甲隨寓戰鬪屢報擒捷鄉井獲全及賊黨壓城果又

調遣鄉兵千餘於城西防拓枕戈待旦曾無休暇未幾  
兵寢衆皆欲其進為自榮計果曰吾昔屢勞捍寇忠義  
所激也今偷安田野足矣干祿豈吾志邪終隱弗耀紹  
定戊子郡人追念不忘咸乞建祠以報遺德范侯鍾成  
之既祠凡里有雨暘水旱必禱禱必應其三世孫應南  
以儒學傳所寶建炎紹興公牒具存

汪觀察介然傳

汪師泰

汪觀察介然字彥確幼失怙恃鞠於祖母個儻不羈年

十八如京師從伯父四友先生學用開封祥符籍領鄉薦補文學免解不第從岳飛軍補宣撫司幹官後從韓世清軍殺獲劉忠等賊補進義校尉收復襄陽等六縣以功遷承節郎紹興間與侍郎沈昭遠使金克上指節使轉忠靖郎就添差克本軍指使先是洪忠宣公皓陷金高宗用其子适為相屢書求皓金以不知所在為辭及公使金遊城上皓聞笑語曰南音也密附蠟丸書公剖股納之歸聞于朝帝召見公以實奏命于御前取書

以進上覽之涕泣乃命适拜公為之厚賂和議乃成明年洪公皓朱公弁張公邵皆南還洪公令諸子孫羅拜之曰微夫人之力不及此适出知徽郡為公建府第朱文公誌朱弁墓得邑人汪介然密附洪公皓蠟丸之功也事見洪公家錄及輜軒集是年公罷任以進義校尉授承信郎添差監臨江軍轉承節郎二十年差克戶部瞻軍酒庫二十一年轉保義郎二十五年差監泰州丁溪鹽場催轄亭戶煎鹽兼本地分巡檢巡捉私茶鹽礬



轉成忠郎三十二年轉忠翊郎隆興元年轉忠訓郎差  
充邕州提舉右江兵馬盜賊公事兼沿溪巡檢使提舉  
訓練三十六洞丁橫山寨駐劄乾道五年轉修武郎九  
年轉武翊郎轉武經大夫淳熙元年宣差東南第六副  
將贛州駐札七年移吉州駐札領軍三千五百人九年  
朝廷令大使檢閱兵馬先是戚公不肯為公保官臣僚  
奏公不諳戰事訓練不精朝廷試公武藝能挽一石二  
斗弓及走馬以鎗提米一石仍其官以觀察使主管台

州崇道觀致仕卒年七十七

李一初澤存祠記徽之屬

族而汪氏其一也汪氏之上世祖武經大夫介然當宋紹興初從侍郎沈昭遠使金時洪忠宣公為金人所留宋音問遼絕大夫以計得竊與公語且得其蠟丸書剖股肉納丸其中歸以遺公之子比公南還命諸子執子弟禮環拜大夫大夫由是顯聞于時其後岳武穆王宣撫江淮辟大夫幹辦公事提舉贛州洞丁橫山寨宣勞翼駐劄為第六副將以壽終于家其居宅則公之子适倅徽時所為築也凡大夫所受宣勅詔誥并厯仕批書三洪往復書帖至于今具存其七世孫周將構祠於大夫之墓以虔祭掃且以藏大夫之手澤故名之以澤存而請記於予予聞諸禮經人子之所以敬其親之手澤者若書冊琴瑟之類是也大夫之手澤豈特書策琴瑟之類哉是宜汪氏之孫子世守而不敢墜也大夫為國盡瘁不避危險以忠義奮身以功名垂世後之士君子凡

聞其風聲而得其手澤者孰不願一快觀以想見其為人而況乎大夫之孫子哉是又宜汪氏之孫子世守之而不敢墜也然自宋南渡至于今數百年中間凡幾變故簪纓圭組之家鮮克自守至有不能保其身者而況乎先世之手澤哉一世二世之手澤且不能保而況六世七世哉世代有遷革而大夫之手澤具完人事有廢興而大夫之手澤無恙謂非汪氏有賢子孫不可也或有疑君子之澤五世而斬者則將應之曰五世而斬者君子之遺風餘澤至五世則泯矣若其手澤之存雖數十世可保也顧其子孫賢不肖何如爾周才學兼著不屑用于時而獨拳拳於大夫之手澤若此可謂無忝爾祖者不賢能如是乎後之來者益加謹焉庶乎其不替也

武翼郎差監泉州市舶務朱公由義墓誌銘

章琰

公諱由義字宜之姓朱氏世居歙之黃墩十世祖制置  
公古寮唐天祐中以陶雅命戍婺源因家焉而長子拱  
衛上將軍歙州團練使雲遂居休陽即晦庵先生七世  
伯祖也公曾祖瑞潛德不耀祖逢時中大夫父晞孟武  
略郎母童氏岳之官裔封安人公生而岐嶷長而敏練  
伯父侍郎晞顏心甚愛之每游宦必與俱丞相周益公  
一見加重特奏補公右階調平江崑山醴曹天台港頭

鎮官三山興化都巡使上饒銀銅場與夫福清戎官泉  
南市舶公之仕其次第可攷也方公之仕也市駿瘴鄉  
備嘗艱阻公一以恩遇部下皆為之謹牧養時水芻馬  
數無耗朝廷屢加賞迨巡使瓜期至母安人疾迂吏感  
公平夷惟恐失公至焚臂以祈安者及任銅場中明利  
害或壓傷部役畀湯藥棺具此其惻隱一念發於性真  
人莫不感慨其他善政未易枚舉官泉南僅歲餘以疾  
卒時番商聞者皆流涕嗟惜此公之忠信篤敬足以行

蠻貊抑於是可覘矣初侍郎公尹京兆公之考武畧在  
焉武畧歿於府治朝紳弔者冠蓋充斥公護柩歸葬長  
弟蘄州判官由道次弟將仕郎由信極力襄事慈親在  
堂定省奉養內外無間言此其孝以事親立身之大節  
也公嗜書史每潛玩有所得輒書黏壁間久而滿室詩  
得唐體有集以秀軒名公嘗訓其子惟賢曰棄文即戎  
非我素志學以志道汝其勉旃惟賢書紳不忘千里從  
師皆當世聞人厯游庠序文聲頗振侍公泉南嘗以文

贊倉部劉侯煒叔侯深器之謂公曰真千里駒公有後  
矣丁酉捧鄉書癸卯預亞選尋任安東州漣水縣丞知  
縣事孫燾早以文學著綽有祖父風積善有素所以流  
芳錫慶未艾也公生於乾道癸巳四月卒於嘉熙己亥  
三月積階至武翼郎娶曹繼劉並封孺人惟賢以淳祐  
己酉十二月辛酉奉葬於古塘之原其山丁離其向子  
癸元配曹氏葬前山密邇公墓今惟賢狀公之實遠來  
乞銘謹第其本末為之銘曰

惟公德人文武弛張厥施未竟必有餘光埋玉於茲長

發其祥施于孫子千古流芳

泉州市舶誥修武郎朱由義右奉聖旨宜差監泉州

市舶務替伊宗尹將來到任成資闕劄付朱由義准此  
紹定六年十月日 漣水縣丞省劄淮東安撫制置大  
使尚書省劄子兩淮安撫制置使司狀照對縣吏之長  
曰丞所以佐理一同也況在邊徼尤當擇人竊見從事  
郎安東州漣水縣丞趙希橋行將書滿下次未曾辟官  
今踏逐到迪功郎新宜差蘄州蘄春縣丞朱惟賢老於  
儒學綽有吏能再轉為丞尚需遠次欲辟充前件差遣  
庶稱官使邑人是宜除已將本官脚色家狀送委特改  
差充壽春府下蔡縣主簿權揚州司法王迪功立中點  
對即無違礙今遵依近降指揮取索本府所授真本付  
身文字見至欲望公朝特賜敷奏將朱惟賢差充安東  
漣水縣丞填趙希橋將來書滿闕仍乞給降付身發下



本司給付施行狀候指揮閏六月六日奉聖旨特依付  
本司須至指揮右劄付新特差充安東州連水縣丞朱  
迪功仰恭依前項省劄內備奉聖旨指揮施行准此咸  
淳九年十二月日 右宋訓武郎朱公由義及其子連  
水縣丞惟賢勅劄二通公八世孫處士彥榮之所藏也  
考朱氏譜其先與文公先生實同所出蓋其上世在唐  
有諱古寮者號制置茶院府君生三子長雲為歙州團  
練使居休寧北街次令滔居休寧首村季廷雋居婺源  
雲傳八世為晞顏宋隆興二年進士工部侍郎封休寧  
縣開國男由義之從父也廷雋傳七世為文公宋紹興  
十八年進士華文閣待制封婺源縣開國男由義之從  
祖也兩派皆開國故鄉而文公道德之學實被乎天下  
後世可謂盛矣縣丞孫永錫嘗編錄侍郎公諸房勅牒  
共九十三通為一帙以傳而此二通則出于彥榮者間  
出相示求識之而前帙有先高祖春坊公之跋不待贅  
也鄉先達尚書襄毅程公長孫壩為予之壻次孫塏為

處士孫壻故獲相還往而得考見故家文獻之詳為題其後詩曰孝子不匱永錫爾類傳曰公侯子孫必復其始朱氏後人尚勗之哉弘治壬子秋九月望日浯溪後學汪奎書

統領程公安節傳

家乘

公諱安節字元亨姓程氏梁將軍忠壯公之後也忠壯十二世都使公澧以禦巢賊有功居休寧澧四世迪為本縣簿子孫定居邑之山斗公則縣簿十世孫也少喜讀武經好馳馬習射以功名自許嘉定四年有詔募雄邊義士公出應募屢隨主將禦金人有功帳前總轄王

德和上言程某忠勤宜加獎擢詔授京西招撫司遊擊  
義士軍副將兼統領時江淮京湖制置使李珣趙方以  
與金人絕好傳檄招諭進討公每在行恩賞有加卒于  
軍歸葬山斗排嶺泰塘原子四人長崇補太學上舍次  
岑早卒次峒為司省掌書次崧從父軍中以功補進武  
校尉進授承信郎諸孫曰寔湖南潭州路分曰傳新淦  
知縣曰華郴州判官曰真行院都事曰榮曰英俱太學  
上舍曰雲曰漢俱宣教郎

補進武校尉牒行在尚書吏部三日奉聖旨第一等功特

補轉四官資第二等功特轉補三官資第三等功特轉  
補兩官資令劉付吏兵部施行準在數內立到第一等  
功特轉四官資并普例三官資通共七官資白身効用  
淮西義士左軍程崧從前項指揮共特轉七官資合補  
進武校尉年四十六本貫徽州休寧縣千秋鄉和化里  
父名安節準勅補充進武校尉右程崧準勅補充進武  
校尉故牒實祐四年九月日給授承信郎勅進武校  
尉程崧右可特授承信郎朕嗣膺大厯聿新文命之敷  
施及小臣亦俾武階之陟既逮事於先帝復欽承於眇  
躬宜渙異恩各增一秩嚴惟邦慶既均海宇之歡若序  
歲勤則有銓曹之格可依前件奉勅如  
右牒到奉行咸淳三年十一月十三日

程武魁 鳴鳳傳

汪子相

程鳴鳳字朝陽號梧岡祁門善禾人少穎異博學洽聞

宋淳祐丙午應武舉寶祐癸丑射策居第一乙卯戊午以經學兩請漕舉初授殿前司同正將除閤門宣贊舍人改知德慶府陞辭指陳時事剴切無所回避上嘉納之將官適部內山獠猖獗或止其行乃正色曰方天下多事之秋正臣子奮忠之日仗馬木鴈吾不忍為也毅然前進未及境奉檄促令赴郡至則條事宜上于帥出奇掩擊磔大慙而尸之餘黨悉平士民咸詠之及代主管建昌軍僊都觀以歸治亭榭于山谷間扁曰盤隱若

將終身焉未幾起知南雄州朝辭進無逸說上獎諭再三比至州常賦外有折銀錢歲輸六千緡亟請復之三年解組而歸終于盤隱焉公精草書工墨戲有讀史發微三十卷詩文二集子美授進武校尉姪克柔任本縣主簿封父母妻勅尚書吏部景定四年九月十四日明堂大禮赦書節文應文武陞朝官父母妻並與封贈訓武郎程鳴鳳故父贈從義郎夢衡右擬贈訓武郎准以申聞准奏景定五年四月日

帥幹程公驥傳

程恕

公諱驥字師孟一字季龍梁將軍忠壯公後十七傳至

諱炳者始居休寧富溪又七傳至學正公以明經起家  
公高祖也曾祖卓祖汝礪父思禮皆克世其學公生而  
器局宏遠偉姿容望之若神人性極聰悟凡諸經子史  
律歷之書一覽輒盡其義時元寇日迫公慨然思為國  
致力遂與諸義士日出習武事兼治七書端平三年勅  
充武學生尋陞上舍開慶元年登周震炎榜進士赴御  
射勅賜武舉出身賜玉軸綾誥錦囊授承節郎分隸鄂  
州駐劄御前諸軍統制司同準備差遣以親老乞就近

改差建康府侍衛馬軍行司同準備差遣未幾丁內艱服闋補舊任考滿轉保義郎除權中書舍人時賈似道崇姦誤國知事不可為遂乞祠主管建昌軍仙都觀久之得請致仕於所居傍鑿池引泉構亭為游息之所榜曰林泉風月日與名勝吟嘯其間不復染指世味也嘗書座右曰無毀之謂譽無憂之謂樂無求於人之謂富無屈於人之謂貴人以為名言宋亡元訪求舊臣甚急公益屏絕自號松軒以見志年七十三而卒娶西路倪



氏側室羅氏子男三曰文豹文虎文陞葬里之和睦干

所著有松軒集若干卷

補武學生勅牒行在國子監學生程驥本貫徽州休寧縣和睦

鄉輕財里祖學正為戶曾祖卓故不仕祖汝礪故不仕父思禮未仕習七書紹定五年補中當年二十一歲牒程驥文武二道有國之常經不可偏廢尚矣國家自中興以來宏建太學以育羣材濟濟相率既底于成復設武學丕承祖宗舊制士之來游日益滋衆爾其孜孜汲汲無忘教養之意尚勉之哉准勅牒補武學生故牒端平三年十二月日牒右宋帥幹程公驥所授武學生勅牒一通大抵宋患在兵弱故南渡後名士多喜談兵然當開景之際似道柄國所謂名士者亦多無以自試蓋不久而宋社屋矣若公其一也然公之曾孫伯順能葺其池亭以還舊觀六世孫尚質能續其譜系及編流芳集以昭先烈八世孫太珍能建保訓樓藏其遺書

而又作祠于墓以奉時祀則公之英抱義槩雖不獲少見于時登名史冊顧其詩禮之業慈孝之規所以施諸家而裕後人者亦不可及矣弘治乙卯夏六月既望休寧陪郭宗後學敏政書



新安文獻志卷九十六上

欽定四庫全書

集部

新安文獻志卷九十七

下

詳校官中書臣孫衡

侍讀臣孫球覆勘

總校官庶吉士臣倉聖脉

校對官中書臣吳俊

謄錄監生臣孫大森

欽定四庫全書

新安文獻志卷九十六下

明程敏政撰

行實材武

元鞏昌總帥隴右汪義武王

世顯

傳

子德臣良臣

孫

惟正

宋濂

汪世顯字仲明鞏昌鹽州人系出旺古族

按汪氏譜越國公第三子

達襲封上柱國越國公征賀魯龜茲高昌有功世守鞏昌唐季沒于李氏號曰汪古族猶曰汪氏舊家云爾西人方言或誤稱汪為旺或誤稱古為骨故元史以為旺古碑文以為汪骨云

書澤民嘗會王之孫襲總帥者于燕京相與通譜

仕金屬立戰功官至鎮遠軍

節度使鞏昌便宜總帥金平郡縣望風款附世顯獨城守及皇子庫騰駐兵城下始率衆降皇子曰吾征四方所至皆下汝獨固守何也對曰臣不敢背主失節耳又問曰金亡已久汝不降果誰為邪對曰大軍迭至莫知適從惟殿下仁武不殺竊意必能保全闔城軍民是以降也皇子大悅承制錫世顯章服官從其舊即從南征斷嘉陵擣大安田楊諸蠻結陣迎敵世顯以輕騎馳撓

之宋曹將軍潛兵相為犄角世顯單騎突之殺數十人  
黎明大軍四合殺其主將入武信遂進逼資普軍葭萌  
宋將依山為柵世顯以數騎往奪之乘勝定資州略嘉  
定蛾眉進次開州時方霖潦由間道攀緣以達宋軍屯  
萬州南岸世顯即水次造船以疑之夜從上游鼓革舟  
襲破之宋師大擾追奔至夔峽過巫山與宋援軍遇斬  
首三千餘級明年師還攻重慶會大暑乃罷歸覲太宗  
錫金符易其名曰中山且歷數其功世顯拜謝曰此皆

聖明福德所致臣何預焉辛丑蜀帥陳隆之貽書請戰  
聲言有衆百萬皇子集諸將議之咸謂隆之可生擒也  
世顯曰顧臨敵何如無庸誇辭為軍薄成都隆之戰屢  
却堅壁不出其部曲田顯約夜降隆之覺之世顯曰事  
急矣亟梯城入救顯得與從者七十餘人出獲隆之斬  
之世顯復簡精銳五百人擣漢州州兵三千出戰城閉  
盡沒三日大軍薄其城又三日克之癸卯春皇子第功  
承制拜便宜總帥秦鞏等二十餘州事皆聽裁決賜虎

符錦衣玉帶世顯先已邁疾至是加劇皇子遣醫絡繹往療竟不起年四十九中統三年論功追封隴西公謚義武延祐七年加封隴右王子七人忠臣鞏昌便宜副總帥次德臣次直臣鞏昌中路都總領歿於王事次良臣次翰臣鄂勒兵馬都元帥佐臣鞏昌左翼都總領歿於王事清臣四川行樞密院副使

德臣賜名田哥字舜輔年十四侍太子游獵矢無虛發襲爵鞏昌等二十四路便宜都總帥從征四川軍出忠



涪所向克獲進攻運山率麾下先所乘馬中飛石死步戰拔外城宋將余玠攻漢中德臣馳赴之玠聞遁去憲宗素聞其名及入覲所陳悉嘉納賜印符命城沔州沔據嘉陵要路德臣繕治室廬部署官屬數日而集進攻嘉定敵潛軍夜出德臣迎戰殺百人還至左綿雲頂宋軍乘夜斫營覺之殺千人生擒百人進次隆慶宋軍仍夜出與力戰盡殺之及馬漕溝遇伏兵與戰獲其統制羅廷鶚又詔德臣城益昌諸戍皆聽節制世祖以皇弟

有事西南德臣入見乞免益昌賦稅及徭役漕糧屯田  
為長久計並從之即命置行部于鞏立漕司于沔通販  
鬻給餽餉奏乞以兄忠臣攝府事使已得專事益昌益  
昌為蜀喉襟蜀人憚其威名諸郡環視莫敢出鬪甲寅  
春旱嘉陵漕舟水溢議者欲棄去德臣曰國家以蜀事  
託我有死而已奈何棄之盡殺所乘馬饗士襲嘉川得  
糧二千餘石雲頂呂遠將兵五千邀戰即陣擒之復得  
糧五千石既而魚關金牛水陸運偕至屯田麥亦登食

用遂給夏獲宋提轄崔忠鄭再立縱令持檄諭苦竹守將南清以城降所俘城中民悉歸之東南戍卒數百有去志德臣揣知之給券縱去皆泣謝未幾山寨相繼輸款宋將余晦遣都統甘閏以兵數萬城紫金山德臣即選精卒銜枚夜進大破之閏僅以身免南清北覲其下殺清妻子以叛蜀將焦遠領兵餉之德臣擊敗遠盡獲所餉資糧冬蜀兵二萬復至又敗之獲糧百餘艘魚關至沔水迂回為渡百有八至是悉為橋梁戊午歲帝親

征次漢中德臣朝行在所初諸路軍成都猝為宋兵所圍德臣遣將赴之約曰先破敵者奏領此城圍遂解詔候江南事定如約以城與之帝幸益昌駐北山謂德臣曰來者言汝立利州之功今見汝身甚小而膽甚大不知敵曾薄汝城否德臣對曰賴陛下洪福未嘗一來帝曰彼憚卿威名耳賜金帶且俾立石紀功嘉陵白水交會勢洶急帝問船幾何可濟德臣曰大軍百萬非可淹延當別為方略即命繫舟為梁一夕而成如履坦途帝

顧諸王曰汪德臣言不虛發賜白金三十斤仍命刻石紀功苦竹既逆命至是攻之巖壁峭絕或請建天橋帝以問德臣曰臣知先登陷陣而已建橋非所知也既而橋果無功乃率將士魚貫而進帝望見歎曰人言其膽勇豈虛譽邪宋將趙仲武納款而楊禮猶拒戰奮擊盡殺之德臣微疾帝勞之曰汝疾皆為我家飲以葡萄酒解玉帶賜之曰飲我酒服我帶疾其有瘳乎德臣泣謝宋龍州守將王德新遣所親願効順以郡民為祈奏如

其請進攻長寧拔之斬守將王佐帝東下德臣為先鋒  
抵大獲山奪水門宋將楊大淵遣子乞活數萬人命引  
至帝前為請旦日大淵率衆降已而運山青居大梁皆  
降攻釣魚山守臣王堅負險五月不下德臣單騎至城  
下大呼曰王堅我來活汝一城軍民宜早降語未既幾  
為飛石所中遂感疾帝遣使問勞俾還益昌奏曰陛下  
尊為天子猶冒寒暑服勞于外臣待罪行伍死其分也  
又遣丞相烏珍賜湯劑卒不起年三十有六中統三年

追封隴西公謚忠烈子六人長惟正次惟賢大司徒惟和昭文館大學士惟明以質子為元帥惟能征西都元帥惟純權便宜都總帥

良臣年十六七即從兄德臣出征每戰輒當前鋒以功權裨帥兼便宜都府叅議癸丑歲以德臣薦為鞏昌帥領所部兵屯田白水蜀邊寨不敢復出鈔略憲宗親征軍至六盤良臣還鞏昌供億所須事集而民不擾詔權便宜總帥府事良臣奏願與兄德臣効力攻四川帝曰

行軍餽餉所係不輕汝任其責自可立功良臣既奉命  
治橋梁平道路營舟車水陸無壅儲積充輒有旨賜黃  
金弓矢旌其能世祖即位阿勒達爾琿塔罕逆命刼六  
盤府庫西垂騷動詔良臣討之馳至山丹置營按兵不  
戰者凡二月俄大舉至耀碑山兩軍相當良臣慷慨誓  
諸將曰今日之事係國安危勝則富貴可保敗則身戮  
家亡苟能用命縱死行陣不失忠孝之名衆聞踴躍而  
前會大風揚沙晝晦良臣手刃數十人賊勢沮衆軍乘



勝擣之賊大潰獲阿勒達爾琿塔罕殺之西鄙輯寧捷  
聞賜金虎符權便宜都總帥中統二年和哩叛復討平  
之入覲賜燕屢稱其功良臣拜謝曰臣奉諸王成算何  
功之有世祖嘉其能讓復賜金鞍甲冑弓矢轉同簽輦  
昌路便宜都總帥宋將咎萬壽帥戰船二百沂江而上  
欲掩青居良臣伏甲數十艘其後身先逆戰萬壽敗走  
伏發幾獲之三年授閬蓬廣安順慶等路征南都元帥  
良臣以釣魚山險絕不可攻奏請就近地築城曰武勝

以扼其往來四年春良臣攻重慶命元帥康圖多先驅  
與宋將朱禩孫兵交良臣塞其歸路引兵橫擊之斷敵  
兵為二敵敗走趨城不得入盡殺之至元六年授東川  
副統軍八年兄子惟正請于朝謂良臣久勞戎行乞身  
代之九年復授良臣昭勇大將軍鞏昌等二十四處便  
宜都總帥兼本路諸軍鄂勒總管明年召入帝曰成都  
被兵久須卿安集之授鎮國上將軍樞密副使西川行  
樞密院事蜀人安之十一年進攻嘉定皆萬壽堅守不

出良臣度有伏兵大搜山谷果得而殺之進壘薄城萬壽悉軍出戰大破之伏尸蔽江萬壽乞降良臣奏免其死居民安堵良臣統兵順流而下紫雲瀘叙相繼款附還圍重慶十三年宋涪州安撫楊立帥兵救重慶者再良臣皆敗走之宋安撫張珏遣將乘虛襲據瀘州良臣還軍平之復攻重慶十五年春張珏悉衆鏖戰良臣奮擊大破之身中四矢明日督戰益急珏所部趙安開門納降珏潛遜良臣禁俘掠發粟賑饑民大悅四川悉平

捷聞世祖喜甚召良臣入覲授資善大夫中書左丞行  
四川中書省事賜白貂裘良臣陳治蜀十五事世祖喜  
納良臣至成都以蜀瘡痍之餘極意循撫行省罷改授  
安西王相不赴十八年夏疾卒年五十一贈儀同三司  
謚忠惠加贈推誠保德宣力功臣儀同三司陝西等處  
行中書省平章政事柱國追封梁國公子七人惟勤雲  
南諸路行省平章政事惟簡保寧萬戶惟某同知屯田  
總管府事惟永征西都元帥惟恭階州同知惟仁人匠

總管達魯噶齊惟新漢軍千戶

惟正字公理幼穎悟藏書二萬卷喜從文士論議古今  
治亂尤喜談兵時出游獵則勒從騎為攻守狀父卒於  
軍皇姪壽王俾權襲父爵守青居山世祖即位遂真授  
焉初憲宗遣琿塔罕以騎兵二萬守六盤又遣奇塔特布  
哈守青居至是琿塔罕叛奇塔特布哈發兵為應惟正即  
命力士縛奇塔特布哈殺之世祖嘉其功詔東川軍事悉  
聽處分中統二年入朝賜甲冑寶鞍三年詔還鞏昌部

長呼都克叛民大擾惟正謂將吏曰呼都克今若獗犬方肆  
狂齧苟一戰不利則城邑為墟當勝以不戰乃發兵踵  
之賊欲戰不得休則撓之若是者兩月知其糧盡勢蹙  
曰可矣與戰屢捷呼都克遣三十人來約降即遣其十人  
還俾呼都克自来因潛兵攝其後出其不意擒殺之至元  
七年宋人修合州詔立武勝軍以拒之惟正臨嘉陵江  
作柵扼其水道夜懸燈柵間編竹為籠中置火炬順地  
勢轉走照百步外以防不虞宋人知有備不敢近九年

帥兵掠忠涪獲令簿各一破寨七擒守將六降戶千六百有奇捕虜五百會丞相巴延克襄陽議取宋惟正奏曰蜀未下者數城耳宜併力攻餘杭本根既拔此將焉往願以本兵由嘉陵下夔峽與巴延會錢塘帝優詔答曰四川事重舍卿誰託異日蜀平功豈巴延下邪未幾兩川樞密院合兵圍重慶命益兵助之惟正奪其洪崖門獲宋將何統制皇子安西王出鎮秦蜀召惟正還十四年冬皇子北伐而藩王圖魯叛于六盤王相府命布

色台領兵進討惟正為副布色台不習兵師行無紀惟正為正部曲肅行陳嚴斥候凡軍政一倚重焉進次平涼簡鞏兵銳者八十人與俱至六盤圖魯據西山惟正分安西兵為左右翼鞏兵獨居中去圖魯一里許皆下馬手弓圖魯遣百騎突陳惟正令引滿毋發將及又命曰視必中而發於是矢下如雨突騎中者三之一餘盡馳還圖魯軍遂走惟正麾兵逐之三踰山至蕭河擒叛將揚珠格爾復進兵圖魯亦就擒安西王至惟正迎謁王



歷稱其功明日大燕賞以金尊杯貂裘王妃賜其母珠絡帽衣且曰吾皇家兒婦也為汝母製衣汝母真福人也詔惟正入朝世祖推玉食食之賜白金五千兩錦衣一襲授金吾上將軍開城路宣慰使十七年遷龍虎衛上將軍中書左丞行秦蜀中書省事賜玉帶以省治在長安去蜀遠乃命惟正分省于蜀蜀土荐罹兵革民無完居一聞馬嘶輒奔竄避匿惟正留意撫循人便安之二十年進階資德大夫二十二年改授陝西行中書省

左丞入覲上都得腹疾還至華州卒年四十四謚貞肅

二子嗣昌武略將軍成都管軍副萬戶壽昌資德大夫

江南行御史臺中丞

學士雍郡虞文靖公汪氏世家勲德錄序國家龍興朔漠威行萬方

金源日蹙吏士守者或降或死且盡不能成軍山東西之間豪傑並起據保城壁大抵非金署置之舊隴右鞏昌汪氏據高制遠統郡縣數十勝兵數萬號曰便宜都總帥柵石門為金守者二世及我兵攻鞏昌則金亡已三世矣汪氏猶不忍降其士大夫皆曰君死國亡民將安歸乃編素為金發喪登陴哭三日因皇子庫騰以自歸太宗皇帝察其誠仍以為便宜都總帥鎮故地取蜀之役資糧甲兵之賦終始畢給功多之紀他將鮮儼焉此諱世顯者所以封隴右王也王有子八人孫十九人多居將相官封公者已八人傳五世兄弟子孫百八十

餘人總軍鞏昌者既世其職餘多大官尤顯者今御史中丞壽昌也其兄成都萬戶嗣昌曰世荷國恩功業在盟府褒卹有制詔世次具譜牒行事歲月則先塋家廟之碑文在請輯錄刻模以傳于世諗諸太史太史虞某曰予觀于功臣之家以世業顯榮固多得統其軍世守其地者惟汪氏或曰道家忌三世為將汪氏之德必有大過人者其言信歟予固以為汪氏先人事故主無憾見信國家非他人所得而及也歟

便宜副總帥汪忠讓公忠臣神道碑

姚燧

便宜副都總帥忠讓公諱忠臣字漢輔便宜都總帥隴西義武公之家嗣便宜都總帥忠烈公德臣中書左丞

忠惠公良臣四川行樞密副使清臣之兄故副都總帥  
惟益之考中書左丞貞肅公惟正今平章政事惟賢中  
書右丞惟孝叅知政事惟勤宣慰使便宜都總帥惟和  
同知宣慰權總帥惟純屯田萬戶上萬戶惟簡惟允上  
千戶惟弼知階西和州惟敬惟恭之伯考今懷遠大將  
軍便宜都總帥安昌為質永昌王必昌之祖宣慰使元  
昌副萬戶朝昌便宜都總帥壽昌之伯祖也卒以至元  
丙寅四月五日受謚于元貞二年丙申推至義武卒年

癸卯實五十四年祖孫一門三世五公又許連姻王室  
自餘將相使牧為質猶十八人此吾元有國而來所無  
者嗚呼不曰世臣之家謂之何哉公王姓由大父彥忠  
世汪骨族故汪姓金主以甲午正月死蔡義武時即險  
移輦治石門山猶行天興正朔明年乙未始下太宗義  
為其主後來仍金官官以便宜都總帥俾從皇子庫騰  
征蜀公留質帝所忠烈質皇子所制後令公從征蜀以  
管軍總領從破文階州大安軍從攻成都入其郭義武

陷伏中急公疾戰殺傷數十人竟衛翼而出壬寅以破  
土番疊州功賜銀符明年義武卒有子七人皇子擇宜  
世帥者意在忠烈謂公曰汝宜世吾欲帥汝弟而得無  
後其心乎公曰王未有言臣欲推授為之與兄有異邪  
王高其行授公鞏昌元帥知府事丙午以前茅忠南功  
授金符故事祖宗實天取符節悉收還之故公金符亦  
歸之官憲宗二年壬子償賜之俾權都總帥事明年癸  
丑世祖以大弟總天下兵既移忠烈一軍戍利州會將

軍南詔馮牙臨洮公來趨覲俾督漕嘉陵繼利州餽公  
造舟棧塗水陸兼行足缺兵籍而恤乏民力始益昌不  
以饑告戊午憲宗自將討蜀忠烈集諸將問計樓上曰  
吾州凋傷之餘玉帛無所於得一旦乘輿至左右近貴  
之臣需求何以為資公則曰吾曹拔身健兒惟有能獎  
率士衆効死前驅何至為是媚人定死前驅公惟恤吾  
妻子其責忠烈泣然灌酒地曰兄與諸將薰心誓是德  
臣何言所孤兄諸將託者有如此酒大駕至利巡所治

樓壁橋隍嘆曰使吾非戍此敵先之則四川領喉之地  
可必能歲月平哉遂移師西南攻劔關之西隘曰苦竹  
隆慶府治其上西北東三面巔絕深可千尺猿猱不能  
緣以上下者也其南一塗一人側足可登不可並行敵  
盡銳禦者惟此而帝勅諸軍攻未至某地無張汝幟自  
伐鼓督之公前登帝望幟張倡為歌呼六軍和之聲動  
天地隘之兵民飛崖如蝶前是獲敵張都統仗為蜀導  
反紿帝曰吾能誘此柵令降遣入行則反為敵用且泄



吾軍何地強弱何倉豐餒教使勿下帝為書繫筒箭三射入柵令必生致獲之磔以徇賚銀為兩四百五十潼川府治長寧山攻復先登賚銀如苦竹數加以金幣為匹二十七復移軍東即嘉陵為舟行計輿礮竿巨絙以從公奏無所事此此前塗所不乏者不若載粟數千石蓋此去多稻而求粟無有宜豫以廩病者時蓬州壁運山閬州壁大獲順慶壁青居廣安壁大梁平破竹皆下東南抵合璧釣魚山渠江水會其下石邑入雲其帥王

堅據不即下礮矢不可及也梯衝不可接也帝欲乘拉  
槁勢不棄去而必拔之故久蹕此時暑我師疫矣忠烈  
卒於軍公泣集將佐議曰吾季卒軍馬革裹屍與國責  
塞子惟正雖未弱冠宜世衆曰公言是公言是願奉以  
代為帥其秋帝崩中統之元制以公為副都總帥從所  
志貳貞肅同戍青居去順慶平土二十里西北東三面  
環江北江殊回遠不可為池南依山而壁平可馬上無  
大艱崎其南即合敵出入吾界無時於兵法為交地公

又子身受之開屯田練軍實遙候斥調強鄰入必摧壞其軍木令棄去後詔貞肅還鞏昌公獨保戍三年璽書褒大之又換金符三年秋抄夔府獲其團練使鮮恭知府張甲及路分二人斬刈千馘獲遣甲仗寶幣不可貲計入覲賚以虎符銀章銀幣如長寧之數而加金為兩五十副以鞍勒弓矢衰其從者且以久勞于邊代以忠惠還之鞏昌俾副都總帥由行省受命還得疾秦亭歸至古漳故第而卒年止四十八其年六月從葬古漳先

域為性安恬出言質直如其心事隴西郡夫人母包以  
孝聞友諸季終其身竭力與才羽翼之人無可間總帥  
府屬郡二十四事至殷也身自為與從父副弟副猶子  
三世時得專殺未嘗妄笞殺一吏一人然至臨敵決戰  
上馬挺槍離陳先次巧捷若神當者紛披莫有我禦其  
弓矢奇中可方古人憲廟出畋遇虎命射之一發斷其  
吭帝喜至解所御金鞍為賜夫人故金蘭定西會德順  
五州帥張雲之女惟益纔世副都總帥二年而卒一女

適鎮撫帥府張文煥老將之從公者每曰公為人信厚  
安昌必昌復信厚可曰善世其家者由安昌求銘公碑  
燧思於公與貞肅所戍之地無不至焉青居之不可恃  
為固者前所以言楊氏張氏蒲氏皆行帥府大獲運山  
大梁平故地與便宜其時目曰四帥府青居南迫合獨  
受敵鋒為三帥扞蔽他日專劉帥戍移貞肅南九十里  
夾嘉陵東西築武勝軍武德軍兩城距合為里亦然晝  
則出邏設伏嘗待進戰夜則晝地分守傳警鼓柝篝火

照城達曙以防竊入一話一言敵盡知之況敢抽兵邀利他求為哉惟是軍當其堅重故三帥反得歲以拔敵柵壘掠敵府庫劉其人民逞志於忠涪夔黔萬施雲安之間上功朝廷用事之臣第知三帥立勞之多而是府獨寥寥也終未有能明其然者又貞肅云青居敵夜大至火民居縛劉帥去鑒夫人之失如此則兩公戍而克完者功不大哉凡此或者貞肅碑所逸故發之此銘曰椒聊遠條求今之世方漢金張纔有汪氏隴西開國義

武肇之義武之為不作倫彝忠讓忠烈忠惠貞肅通芟  
川涼力協謀一繼繼其來將相之多不符垂躬必斧手  
柯歸覲私廟庭笏駢羅公以其序太宗義武於弟以子  
宜不降俯乃推僞功潛不自張等翊吾家聞命即行安  
流洋洋如水就防所由不年其盡瘁致子而天闕歸以  
何戾彼蒼者穹監下而公惟我皇上心靡不同疇德未  
報未隆何功三紀後公一朝哀崇公有令孫人曰公似  
雖華其年已踐公位古者大宗合族恃之祭求其膳尊

祖之思胥是冢旁可萬家邑表阡有碑車過者式

大學士建

安楊文敏公隴西汪氏世譜序世之所謂世臣舊家多矣其能使勲業之盛愈遠而有耀子孫之傳愈隆而不替繼繼繩繩歷數百年如一日者又豈多見哉予觀隴西汪氏之譜而深有羨焉蓋其作於前者既克有功德於民承於後者又莫不勵忠孝建勲業有光厥祖宜其垂聲振華歷金元而逮於今日也然則論世臣舊家之盛者孰有越於汪氏哉汪之先連世為隴右古族都總管傳三世曰世顯元拜便宜總帥專制秦鞏等二十餘州事世顯子七人長忠臣鞏昌便宜副總帥次德臣直臣良臣翰臣佐臣清臣俱有功至大官而德臣良臣尤顯孫十有九人多居將相而惟正尤著自其身以及孫曾終元之世百八十餘人追封王者三封公者七尚主者二其他列朝著典藩方分符建節聯珪疊組為時顯人者不可勝紀於戲何其勝哉忠臣之後曰庸者別諱



欽定四庫全書

新填文獻志  
卷九十六下

十九

靈真保元季襲都總帥資善大夫陝西行中書省左丞  
洪武初以其所守故地版圖來歸太祖皇帝嘉之授昭  
勇大將軍鞏昌等處都總府都總帥後罷總帥府改授  
安遠將軍鞏昌衛世襲指揮同知迨今又四世矣庸傳  
義義二子長福字伯昇調守滁州衛嘗修輯其宗譜次  
壽字永年今任陝西都指揮僉事掌鞏昌衛事俱克紹  
先緒者也永年間以伯昇所輯宗譜來請予序予重其  
意不獲有辭夫譜非但以推本原之遠聯族屬之衆而  
誇閭閻之華也蓋將以昭先德示後人思所景仰而紹  
續之也始舉其顯著者為汪氏子孫言之世顯當元太  
宗時金亡郡縣望風納款獨世顯為金城守者三年已  
而度勢不可支欲全活一道之民乃為金發喪登陴哭  
三日始率衆歸附元帥平蜀功居諸將右卒贈推忠協  
力佐運功臣太師隴西公謚義武追封隴右王此其作  
於前者至若德臣之事憲宗良臣惟正之事世祖或膽  
畧威名敵不敢近或所過禁俘掠發粟賑饑或治蜀留

意撫循人民便安其卒謚贈封爵俱不減其祖父是皆  
資兼文武世篤忠貞豐功盛烈烺烺炳炳播諸史傳而  
家乘所載者又不可殫錄入我國朝則庸之保境恤民  
勲蹟尤偉此其承於後者也嗟夫莫為於前雖美弗彰  
莫繼於後雖盛弗傳汪氏子孫數世以勲業相承愈遠  
有耀愈隆不替如此為其後人者烏可不思景仰而紹  
續之邪若然則為斯譜之榮為世臣舊家之光雖累數  
十百世詎有涯哉此伯昇永年惓惓修譜之意而予之  
所樂告者  
也是為序

新安文獻志卷九十六下